

VENDIM
Nr. 792, datë 9.11.2016

**PËR DHËNIEN E MIRATIMIT PËR NDËRTIMIN DHE SHFRYTËZIMIN E IMPIANTIT
ME RIKUPERIM TË ENERGJISË NGA TRAJTIMI I MBETJEVE URBANE, NË QYTETIN
E ELBASANIT, SHOQËRISË “ALBTEK ENERGY” SHPK**

Në mbështetje të nenit 100 të Kushtetutës dhe të pikës 1, të nenit 49, të ligjit nr. 43/2015, “Për sektorin e energjisë elektrike”, me propozimin e ministrit të Energjisë dhe Industrisë, Këshilli i Ministrave

VENDOSI:

1. Dhënien e miratimit për ndërtimin dhe shfrytëzimin e impiantit me rikuperim të energjisë nga trajtimi i mbetjeve urbane, në qytetin e Elbasanit, shoqërisë “Albtek Energy” sh.p.k., sipas dokumentit që i bashkëlidhet këtij vendimi.

2. Ngarkohet Ministria e Energjisë dhe Industrisë për zbatimin e këtij vendimi.

Ky vendim hyn në fuqi menjëherë dhe botohet në Fletoren Zyrtare.

ZËVENDËSKRYEMINISTRI
Niko Peleshi



REPUBLIKA E SHQIPËRISË
MINISTRIA E ENERGJISË
DHE INDUSTRIË

MIRATIM

Nr. 4551/ datë 31.10 2016
7

PËR

**NDËRTIMIN DHE SHFRYTËZIMIN E IMPIANTIT ME
RIKUPERIM TË ENERGJISË NGA TRAJTIMI I MBETJEVE
URBANE, NË QYTETIN E ELBASANIT, NGA SHOQËRIA
“ALBTEK ENERGY” SHPK**

Në mbështetje të pikës 1, të nenit 49, të ligjit 43/2015, “Për sektorin e energjisë elektrike” dhe të Vendimit nr. 822, datë 7.10.2015, të Këshillit të Ministrave, “Për miratimin e rregullave dhe procedurave të ndërtimit të kapaciteteve të reja prodhuese të energjisë elektrike që nuk janë objekt koncesioni”,

Duke pasur parasysh se:

- a) Shoqëria “Albtek Energy” sh.p.k., e regjistruar pranë Qendrës Kombëtare të Regjistrimit, me Nr.L41914013H, me seli në Tiranë, në adresën Rr. “Ibrahim Rugova”, Sky Tower, Zyra 13/2, është pajisur me autorizim paraprak Nr.6970/5 datë 18.2.2015;
- b) Shoqëria ka paraqitur studimin e plotë të fisibilitetit teknik, ekonomik, financiar dhe mjedisor e social me të dhënat e zonës së zbatimit të projektit;
- c) Shoqëria mbështetur në këtë studim, ka nënshkruar me Ministrinë e Mjedisit një kontratë koncesioni të formës BOT, për ndërtimin dhe administrimin e impiantit të përpunimit të mbetjeve urbane në Qarkun e Elbasanit;
- d) Shoqëria ka paraqitur planin e biznesit dhe grafikun e zbatimit të projektit;
- e) Shoqëria ka paraqitur dokumentacionin që provon të drejta mbi sipërfaqen e truallit ku do të ndërtohet impianti;
- f) OSHEE ka dhënë miratimin paraprak për lidhjen e këtij impianti me rrjetin e shpërndarjes;

Ministria e Energjisë dhe Industrisë (MEI) autorizon shoqërinë “Albtek Energy” sh.p.k., për ndërtimin dhe shfrytëzimin e impiantit me rikuperim të energjisë nga trajtimi i mbetjeve urbane në qytetin e Elbasanit, me kushtet dhe specifikat si vijon:

1. Impianti do të ndërtohet brenda sipërfaqes së përcaktuar me vendimin Nr.117 datë 19.12.2014, të Këshillit Bashkiak të Elbasanit.
2. Impianti që miratohet të ndërtohet ka karakteristikat e mëposhtme:
 - burimin gjenerues të energjisë elektrike prej djegies të mbetjeve të ngurta urbane (MNU);
 - kapaciteti i instaluar është 2,9 MW;
 - konsumi i brendshëm i centralit 0,35 MW;
 - kapaciteti neto prodhues është 2,55 MW;
 - prodhimin vjetor i energjisë elektrike 17,250 MWh;
 - jetëgjatësia e pritshme e burimit gjenerues të energjisë është 313 ditë pune në vit;
 - tensioni nominal në dalje të gjeneratorit është 400 V;
 - impianti do të lidhet në Nst 400/220/30 kV, në zbarrat 30 kV;
3. Shoqëria "Albtek Energy" sh.p.k., do të përfundojë ndërtimin e impiantit brenda 18 muajve nga fillimi i punimeve të ndërtimit.
4. Shoqëria do të raportojë çdo muaj pranë MEI-t mbi ecurinë e ndërtimit dhe operimit të këtij impianti. MEI ka të drejtë të kërkojë çdo informacion tjetër shtesë që e konsideron të nevojshëm në zbatim të kushteve të këtij autorizimi.
5. Brenda 30 ditëve nga data e hyrjes në fuqi e këtij miratimi, do të nënshkruhet një kontratë ndërmjet MEI-t dhe Shoqërisë "Albtek Energy" sh.p.k mbi afatet dhe penalitetet në rast mosrealizimi në kohë të projektit apo transferimit të autorizimit pa miratim, si dhe çështje të tjera që lidhen me zbatimin e projektit.
6. Shoqëria "Albtek Energy" sh.p.k., do t'i paguajë çdo vit ministrisë përgjegjëse për energjinë, një royalty të barabartë me 2% të sasisë vjetore të energjisë së prodhuar ose vlerën në lekë të kësaj sasive së bashku me çdo përfitim tjetër shtesë, të përfituar në bazë të incentivave të tregut të energjisë.
7. Kohëzgjatja e këtij miratimi është 25 vjet duke filluar nga data e hyrjes në fuqi.
8. Miratimi hyn në fuqi me hyrjen në fuqi të vendimit përkatës të Këshillit të Ministrave për dhënien e këtij miratimi.

MINISTRI
Damian Gjoknuri

